

SOGENIS AEGINETAETAE
VICTORIA QVINQVERTII
DISSERTATIO

CREATIONI

XVI. PHILOS. DOCTORVM ET AA. LL. MAG.

RECTORE. MAGNIFICO

D. CHRISTIANO ERNESTO WEISSIO

IURIS CRIMINALIS PROFESSORE ORDINARIO ECCLESIAE CATHED. NVMBVRG.
CANON. CAPITVLARI SVPREMAE CVRIAE REGIAE CONSILIARIO FACVLTATIS
IVRIDICAE ADSESSORE ET H. T. DECANO

PRO CANCELLARIO

CAROLO BRANDANO MOLLWEIDIO

MATHEMAT. P. P. O. REGIAE SOCIET. GOETTINGENS. A COMMERCII LITTERAR.
SOCIET. NATVRAE SCRVTATORVM LIPSIENSIS ET HALENSIS NEC NON
OECONOM. LIPSIENS. SODALI

DECANO

GVILIELMO TRAVGOTTO KRVGIO

PHILOSOPHIAE THEORETICAE PROFESSORE P. O. COLLEGII MINORIS PRINCIPVM
COLLEGA SOCIETATVM BEROLINENSIS ET REGIOMONTANAE GERMANICAE ET
IENENSIS LATINAE SODALI

SCRIPTA

▲

GODOFREDO HERMANNO

ELOQ. ET POET.

D. VIII. MARTII A. MDCCCXXII.

LIPSIAE

LITTERIS STARITII, TYPOGR. VNIVERS.

76 94

UNITED STATES DEPARTMENT OF JUSTICE

IN RE: [Illegible]

[Illegible]

[Illegible]

[Illegible]

[Illegible]

[Illegible]

[Illegible]

[Illegible]

[Illegible]

[Illegible]

[Illegible]

[Illegible]

[Illegible]

[Illegible]

[Illegible]

Nihil facilius usu venire videmus, humanissimi Candidati, quam ut quis falsa, si ab antiquis auctoribus tradita sint, pro veris habeat. Id quemadmodum mihi ipsi in memorabili, quodam loco Pindari accidit, quum commentationes illas, quae Heynianae editioni insertae sunt, scriberem, ita idem in eodem Pindari loco, accidisse video etiam novissimis huius poetae interpretibus, Aug. Boeckhio, Lud. Dissenio, et Fr. Thierschio. Eum locum hac scribendi opportunitate mihi retractandum sumpsi, hoc potissimum fine, ut quinquertii rationem, quae nondum satis videtur explicata esse, explanarem. Quod si quid attulerim, quod non improbable videatur, id quum omnibus, qui antiquitatis peruestigatione delectantur, tum illis ipsis quos dixi viris, quorum eruditionem magni facio, non ingratum fore spero. Est autem ille Pindari locus in Nemeorum carmine VII. quod scriptum est in Sogenem Aeginetam, qui Nemea quinquertio vicerat. Eius carminis interpretationem totam perturbavit scholiastes, quum id egisse Pindarum dixit, ut sese expurgaret Aeginetis, quibus in paeane quodam iniquius quid in Neoptolemum scripsisse visus esset. Id grammaticos commentos esse, ut haberent, quo quae in extremo carmine de Neoptolemo dicta sunt explicarent, vel ex eo potest intelligi, quod verba paeanis illius, ἀμφιπόλοισι μαρ-
νάμενον μοιριάν περὶ τιμᾶν periisse Neoptolemum, multo minus excusatione indigent, quam quae in hoc Nemeaeo carmine, quod illis excusandis scriptum putant, de eodem Neoptolemo dici videmus. Verissime enim iudicavit Dissenius, nihil aliud, quam ista ipsa verba, in paeane illo scriptum fuisse, quod aliquam speciem iniquitatis in Neoptolemium haberet. Magis vero ipsum hoc in Sogenis victoriam carmen longe aliam poetae mentem

fuisse ostendi. Sogenem primum ex gente Euxenidarum in ludis sacris victorem fuisse, certo colligi potest ex eo, quod, si ante illi aliqua victoria inclaruissent, id non praeteriisset Pindarus. Nunc, a patria laudis materiam repetens, Aeacidas celebrat, Aiacem, maximeque Neoptolemum, cuius commemoratione sic utitur, ut Euxenidas consoletur, quod diu inglorii fuerint: nam eo spectare autistropham tertiam, non videtur dubitari posse. Sed quae praecedunt verba, quum prava interpunctione laborent, fecerunt, ut a vero sensu aberrarent interpretes. Quum poeta Neoptolemum, Delphis sepultum, praesidem esse Pythiorum certaminum dixisset, ita pergit: οὐ ψεύδεις ὁ μάρτυς ἐργασίων ἐπιστάτῃ, Αἰγίνα, τεῶν Διὸς τ' ἐκγόνων. Θρασὺ μοι τοῦ εἰπεῖν φαιναῖς ἀρεταῖς ὁδὸν κυρίαν λόγων οἰκοθεν. „Non mendax,“ inquit, „testis ille praeest certantibus Aeginetis: fidenter hanc dico virtutibus eorum viam ad laudem esse, ab ipso patrio solo exortam.“ Quae his aduectit, in omni re bonam esse requiem, nec quidquam semper vigere; aliis autem alia obtingere, neque eundem hominem omni felicitate frui, satis ostendere videntur, non abstinuisse Euxenidas a sacris certaminibus, sed non esse victoria potitos: idque ut in Pythiis accidisse coniciamus, illa ipsa suadent, quae de Neoptolemo dicit. Videtur autem in his ludis pater Sogenis, Theario, quum certaret (id est enim τόλμαν καλῶν ἀρεσθαι) victus esse, et quidem a viro Achivio, hospite Pindari. Hoc si sumimus, quae de Thearione dicuntur, omnia plana sunt, ut quae in hanc sententiam dicta sint: „tibi, Theario, non contemnenda obtigit felicitas, ut, quum tentaveris certamina, non desit animi moderatio.“ Absit, ut te reprehendam, qui te debita potius laude, optimo virtutis praemio, ornem. Neque si adesset Achivus ille, qui te vicit, mihi succenseret, quod te lando: id et hospitio eius fretus dico, et rectis oculis cives intueri suetus, non superbus, et ab iniuria facienda abhorrens. Sed laetum tibi posterum tempus veniat: tum cognito, qui sis, dicet quis, an dissono te carmine reprehendere voluerim.“ Achivum illum, qui, licet victor, tamen virtutem Thearionis expertus esset, nominatim commemorare parum decorum fuisset, ne, ubi

Thearionem laudare poeta vellet, victorem eius laudare videretur. Quare a patria eum designat. Quis esset, satis sciebant Euxenidae. Postrema verba, ut hoc obiter adiciam, rectius ita scribentur: *μαθὼν δ' ἂν ἐρῇ, εἰ παρ' μέλος ἐρχομαι ψέγιον ὄαρον ἐννέπων*. Iam recte intelligi poterunt, quae in fine carminis scripta fraudem fecerant grammaticis. Nam quum Herculem invocasset poeta, ut quum alia Euxenidis bona, tum victorias, qualis Sogenis esset, et meliores concederet, his verbis finem facit canendi:

*τὸ δ' ἐμὸν οὐ ποτε φάσει κέαρ
ἀτρόποισι Νεοπτόλεμον ἐλκύσαι
ἔπεισι· ταῦτα δὲ τρεῖς τετράκι τ' ἀμπολέειν
ἀπορία τελέθει, τέκνοι-
σιν ἄτε μαυυλάκας, Διὸς Κόρινθος.*

Quorum verborum haec sententia est: „hoc si iis obtigerit, non putabo me absonis dictis iniuriam fecisse Neoptolemo, quem dixi Aeginetis in certando favere: sed haec saepius iterare, ineptum est.“ Auguratur itaque his verbis, Neoptoleum, si Thearioni, quamvis strenue certanti victoriam eripi passus esset, at genti eius posthac in adipiscendis victoriis adiutorem fore.

Revertor iam ad propositum. Postquam de Thearione dixerat poeta, convertit se ad Sogenem his verbis:

*Εὐξενίδα πάτραθε Σωγενές, ἀπομνύω
μῆ, τέρμα προβάς, ἄκονθ'
ὥτε χαλκοπάραιον ὄρσαι
θοᾶν γλῶσσαν, ὅς ἐξέπεμψεν παλαισμάτων
αἰχένα καὶ σθένος ἀδιάντον αἰ-
θωνι πρὶν ἄλλω γυῖον ἐμπεσεῖν.
εἰ πόνος ἦν, τὸ τερπνὸν πλέον πεδέρχεται.
ἔα με. νικῶντί γε χάριν εἴ τι πέραν ἀερθεῖς
ἀνέκραγον, οὐ τραχὺς εἰμι καταθέμεν.*

Hic est enim ille locus, de quo me disputaturum significabam. In aliis libris *ἐξέπεμψας* scriptum est. Scholiastes tertiam personam agnoscit, nec tamen verbum illud ad *ἄκοντα*, sed ad Sogenem

refert. Scribit enim: ἀπὸ τοῦ πρὸς αὐτὸν λόγου εἰς τὸν περὶ αὐτοῦ μετέστη. Vnde suspicio nascitur, ἐξέπεμψας interpretibus vel correctoribus deberi. Putat autem scholiastes, affirmare poetam, se non ultra metam proiecisse iaculum. Reliquorum verborum duplicem affert interpretationem. Ipse eo, quod vicisse dicatur Sogenes ante calorem solis meridiani, dexteritatem et celeritatem certaminis designari putat. Alios autem sic existimare scribit, quum iaculo vicisset Sogenes, deterritos adversarios reliqua certamina detrectasse. Boeckhii, qui verba ὡς ἐξέπεμψεν ad iaculum, non ad Sogenem retulit, hunc esse sensum putat: „deiero me non ultra terminum concitaturum linguam ut iaculum, quod non sudantem a lucta cervicem ante fervidiores solis radios dimisit.“ Respici enim ad id, quod interdum factum esse, ut, qui quinquertio certarent, ubi iaculo longe superassent metam, a reliquis certaminibus deterrent adversarios. Eam coniecturam, auctoritate Boeckhii fretus, probat Dissenius, proluxaque oratione explicare studet. At obstat illi sententiae verbum ὄρσαι, quod non potest futuri temporis significationem habere; obstat suspicissima fides narrationis illius de detrectatis propter iaculandi eximiam artem reliquis quinquertii certaminibus; obstat ordo ipse quinquertii certaminum; obstant denique verba τέρμα προβάς, quae ab omnibus interpretibus secus, quam possunt intelligi, accepta sunt. Dicam de singulis. Atque illud quidem per se planum est, si de eo, quod facturus esset, loqui poeta voluisset, ὄρσειν eum scribere debuisset. Quamquam hoc argumento contra Boeckhium Disseniumque uti nolo. Non est enim opus futuro, si, quod recte fieri potest, aoristi infinitivum de praesenti tempore usurpatum putas. Quo facto ambiguum erit, utrum verba ista de illis, quae iam dicta sunt, an de his, quae statim dicturus sit poeta, intelligi debeant. Graviora vero sunt caetera.

Ac primum quidem quo tandem auctore constat, iaculi immenso iactu umquam deterritum esse quemquam, ut a reliquis quinquertii certaminibus abstineret? P. Fabrum nominat Boeckhii in Agonistico lib. II. cap. 27. At nihil ibi Faber, nisi quod ex male intellecto quodam Plutarchi loco colligit, athleticis, si

nullus adesset adversarius, permissum fuisse, ut ipsi prehenderent coronam. Plutarchi verba, quae sunt in principio libri *περὶ φιλοπλουτίας* p. 523. D. ne quis dubitet de Fabri errore, adscripsi: *Ἰππομάχος ὁ ἀλείπτης, ἐπαίνούντων τινῶν ἄνθρωπον εὐμήκη καὶ μακρὰς ἔχοντα χεῖρας ὡς πυκτικόν, εἶπερ; ἔφη, καθελεῖν ἔδει τὸν στέφανον κρεμάμενον· τοῦτ' ἐστὶν εἰπεῖν πρὸς τοὺς τὰ καλὰ χωρία καὶ τὰς μεγάλας οἰκίας καὶ τὸ πολὺ ἀργύριον ὑπερεκπεπληγμένους καὶ μακαρίζοντας, εἰγ' ἔδει πωλουμένην πρίασθαι τὴν εὐδαιμονίαν.* Neque vero Faber lib. III. c. 22. ubi de iis, qui ἀκοντι coronati sunt, disserit, quidquam protulit, quo illud, quod Boeckhio placet, confirmetur. Nec mirum. Nam quum is tantum quinquertio victor esset, qui in omnibus illis quinque certaminibus superior evasisset, quis credat adversarium, etiamsi iaculo se vincere non posse intelligeret, tamen non alio genere certaminis efficere studuisse, ut, si ipse non victor renunciaretur, tamen etiam alteri honorem illum eriperet?

Quid vero, si ordo ipse certaminum, e quibus constabat quinquertium; impediēbat, quo minus id fieret, quod sumitur, iaculi iactu a lucta deterritum esse adversarium? Boeckhius quidem iaculum in quinquertio quartum, luctam autem quintum locum obtinuisse opinatur, argumentis his usus, primo, quod consentaneum videatur, a facilioribus initium factum esse, a quo deinceps ad difficiliora procederetur; deinde testari illud versum, quo partes quinquertii enumerantur,

ἄλμα, ποδωκείην, δίσκον, ἄκοντα, πάλην.

denique ex Pausania III. 11, 6. intelligi, cursum et saltum prima fuisse. Horum quod primo loco attulit Boeckhius, facile quis verum esse credat, si nulla in contrariam partem exstarent testimonia. Quamquam, si talia ex rei ipsius natura coniectanda sunt, nemo non videt, multa etiam ad infirmandam illam sententiam proferri posse. Quare satius videtur, in huiusmodi re a coniectura abstinere.

Non plus ponderis habet illud argumentum, quod ex versa Simonidis depromptum est. Nam Simonides in epigrammate illo, quo Diophontem Isthmia et Pythia vicisse scripsit, ut genus cer-

taminis indicaret, pro quinquertio partes eius enumeravit, quod eum illo ordine verborum fecisse, qui metro conveniret, tanto verisimilius est, quod neque quo ordine peragerentur ista certamina dicere voluit, neque ut id diceret opus habuit apud eos, quos id minime latebat. Ita esse, alii versus docent, propter eandem causam alium habentes certaminum illorum ordinem, ut:

ἄλμα, πάλη, δισκεύματ', ἀκόντιον, ἡδὲ δρόμημα.

Sic enim restituendus versus, quem vitiatum affert Eustathius p. 1320, 19. (1440, 46.) Et qui ibidem leguntur:

ἄμα ποδῶν, δίσκου τε βολή, καὶ ἀκοντος ἐρωή,
καὶ δρόμος, ἡδὲ πάλη· μία δ' ἐπλετο πᾶσι τελευτή.

Et his quidem, si de ordine certaminum quaeritur, nemo non plus tribuet, quam Simonidi, vel alteri isti apud Eustathium versui. Quum enim et descriptionem contineant quinquertii, et in ampliore duorum versuum spatio nulla metri necessitas impediverit, quin suo ordine singulae partes enumerarentur, facile videri poterunt illud ipsum praebere, quod quaerimus, idque tanto magis, quod etsi in scholiis ad Platonem p. 87. scriptum est, ἔστι γὰρ πένταθλος οὗτος τοῖς νέοις ἀγωνία, πάλη, σίγυννος, ἄλμα, δίσκος, καὶ δρόμος, tamen eundem ordinem, quem versus illi habent, duo alii sequuntur scholiastae, Sophoclis ad El. 691. ἄλμα, δίσκον, ἀκοντα, δρόμον, πάλην, ταῦτα ἐν μιᾷ τις ἠγωνίζετο ἡμέρα, et Pindari ad Isthm. I. 39. τὸ πένταθλον, ὅπερ ἦν ἄλμα, δίσκος, ἀκόντιον, δρόμος, πάλη. Et tamen, nisi forte statuas aut mutabilem fuisse ordinem certaminum, aut aliis in ludis alium, quorum neutrum verisimile est, ne hic quidem ordo is est, quo sese excipiebant partes quinquertii. Obstat enim Pausanias, cuius non potest non gravissima esse in hoc genere auctoritas. Commemoravit hunc quidem ex Fabro etiam Boeckhius, sed videtur verba eius minus accurate considerasse, qui nihil aliud ex iis collegerit, quam prima fuisse in quinquertio saltum et cursum. Ita enim scribit Pausanias III. 11, 1. Τι-
σαμενῶ δὲ ὄντι Ἡλείω τῶν Ἰαμιδῶν, λόγιον ἐγένετο, ἀγῶνας ἀναιρηθεῖσθαι πέντε ἐπιφανεστάτους αὐτόν. οὕτω πένταθλον

Ὀλυμπίᾳσιν ἀσκήσας, ἀπῆλθεν ἡττηθείς· καίτοι τὰ δύο γε τῶν
 πρώτος· καὶ γὰρ δρόμῳ τε ἐκράτει καὶ πηδήματι Ἱερώνυμον
 τὸν Ἀνδριόν· καταπαλαισθεὶς δὲ ὑπὸ αὐτοῦ καὶ ἀμαρτῶν τῆς
 νίκης, συνήσει τοῦ χρησμοῦ, διδόναι οἱ τὸν θεὸν μαντευομένῳ
 πέντε ἀγῶνας πολέμῳ κρατῆσαι. Si ex hoc loco prima fuisse cur-
 sum et saltum apparet, apparet etiam tertium locum tenuisse
 luctam: ut lucta non potuerit, quemadmodum Boeckhio visum
 est, ultima esse. Apertum est enim, hoc dicere Pausaniam, quum
 cursu et saltu superior fuisset Tisamenus, ubi ad tertium certa-
 men, luctam, perventum esset, victum esse, ac tum intellexisse,
 non de quinquertii victoria, sed de quinque bellicis victoriis dixisse
 oraculum. Nam ut primum victus in quinquertio est Tisamenus,
 statim intelligere debuit, male se dictionem oraculi interpretatum
 esse. Quodsi lucta ultima pars quinquertii fuisset, lucta autem
 ille victus oraculi mentem perspexit, debuisset Pausanias non
 cursum et saltum, sed caeteras quattuor partes quinquertii com-
 memorare, quibus ille, priusquam ad luctam pervenisset, Hiero-
 nymo fuisset superior. Et profectò ille sola est ab Hieronymo
 lucta victus: in caeteris illum vicit. Nam qui eandem rem re-
 fert, Herodotus IX. 33. per solam luctam stetisse scribit, quo
 minus quinquertio vinceret Tisamenus: ἀσκήων δὲ πεντάεθλον,
 παρὰ ἐν πάλαισμα ἔδραμε νικᾶν Ὀλυμπιάδα, Ἱερωνύμῳ τῷ Ἀνδρίῳ
 ἐλθὼν ἐς ἔριν. Confirmat hic locus id, quod supra dicebam,
 etiam si quis victus esset aliqua in parte quinquertii, tamen eum
 reliqua certamina peregissee, ut certe aut eriperet ei, a quo supera-
 tus esset, victoriam quinquertii, aut quantum in ipso esset, laudem
 eius minueret. Non obscurum est enim, si Pausaniae verba cum
 Herodoti testimonio conferas, quamvis in tertio certamine victus
 esset Tisamenus, tamen eum quartum quintumque non modo in-
 iisse, sed etiam vicisse, ut si non victor evaderet quinquertii, ta-
 men quam proxime ad illam laudem accederet. Aperte autem
 Herodoti verba arguunt, neminem, nisi qui in omnibus quinque
 certaminibus adversarium superasset, victorem quinquertii habi-
 tum esse. Id propter illa dico, quae P. Faber I. 27. attulit, ex
 Polluce III. 151. ἐπὶ δὲ πεντάεθλου τὸ νικῆσαι ἀποτριάξαι λέγου-

σιν, et ex Plutarchi Q. Symp. IX. 2. p. 738. Α. διὰ τοῖς τρισίν, ὥςπερ σὶ πένταθλοι, περίεστι καὶ νικᾷ. Plutarchum enim quinquertionem pro luctatore nominasse certissimum est, quia id merito primum esse dicit, quod tribus modis antecellat, non autem de eo loquitur, quod, si saepius nequeat, ter saltem superius sit. Similique ex loco Pollucis adnotationem, nisi ipse erravit, hauriam puto. In sola enim lucta *τριαγμὸν* locum habuisse constat. Sed haec obiter.

Apertum est ex his, quae dixi, primas duas partes quinquertii cursum et saltum fuisse, tertiam luctam, ut discus et iaculum postrema fuerint, sive quartus sive quintus iaculo locus datus erat. Itaque nisi quis ostenderit, Nemeac alium horum certaminum ordinem, quam in Olympiis fuisse, quod non est verisimile, plane fieri non potuit, ut aut Sogenes, aut quisquam alius, iaculo metam longe superans, a lucta deterreret adversarios.

Alia igitur tentanda erit via. Sumamus tantisper; quod placet interpretibus, verba *τέρμα προβάς* significare *ultra terminum*, quae autem de lucta dicuntur, ad Sogenem spectare. Si ita est, ut caetera mittam, dura foret et inconcinna oratio, si ὅς ἐξέπεμψας legitur: „iuro me non trans finem iaculatum esse, Sogenes, qui corpus sine sudore a lucta retulisti ante maximum solis aestum.“ At melius oratio procedit in altera scriptura, ὅς ἐξέπεμψεν, et huic quoque praestabit, si scripserimus ὃ σ' ἐξέπεμψεν. Tum hic erit sensus: „iuro me non trans finem concitasse celerrimam linguam, velut iaculum illud, quod te ante vehementiorem solis aestum sine sudore luctae dimisit.“ Referendum hoc foret, ut scholiastae visum est, ad dexteritatem Sogenis, qui tam cito deiecerit adversarium, ut ante ardentissimum calorem solis iaculo certare potuerit: quod hinc ultimum in quinquertio fuisse colligemus. Scio obstare quodammodo huic interpretationi Pausaniae auctoritatem, si idem in Nemeis, qui in Olympiis mos obtinuit. Sic enim ille VI. 24, 1. scribit de Hellanodicis: εἰσιᾶσι δὲ, πρὶν μὲν τὸν ἥλιον ἀνίσχειν, συμβάλλοντες δρομέας, μεσοῦσης δὲ τῆς ἡμέρας, ἐπὶ τὸ πένταθλον καὶ ὅσα βαρέα ἄλλα ὀνομάζουσιν.

At non solum pro maiore vel minore cursorum frequentia serius vel citius committi quinquertium debuit, sed etiam, ut demum circa meridiem coeperit, nihil impedit, quin hoc dicere poetam putemus, citius confectum esse, quam augescens solis calor sudorem ciere potuerit. Verum tamen nihil horum defendi potest. Nam si Pindarus his verbis linguam suam cum illo iaculo, quo Sogenes vicit, comparat, quod vel per se ineptum est, aut semet ipsum, aut Sogenem vituperat. Etenim si iurat, se non trans finem iaculatum esse, quod fecerit Sogenes, qui ea re vicerit, male se iaculatum esse iurat; sin ita se finem iaculo non superasse affirmat, ut ultra iaculari idem esse velit atque aberrare a meta, reprehendit Sogenem, quem id ipsum fecisse, eoque facto adeo victorem evasisse ex eo consequitur, quod huius iaculo linguam suam comparat. Accedunt ad haec alia non minus perversa atque absurda. Primum enim, quomodo illa potuit adiicere: *εἰ πόνοσ ἦν, τὸ τερπνὸν πλέον πεδέχεται*? Nam si cito et sine sudore confecta est lucta, facilis fuit, non laboris plena. Deinde autem quod addit: *ἔα με. νικῶντί γε χάριν, εἴ τι πέραν ἀερθεῖς ἀνέκραγον, οὐ τραχύς εἰμι καταθέμεν*. id plane alienum est. Non enim haec verba aliam interpretationem admittunt, quam hanc: „sine me: victoriae tuae gratia, si quid longius digressus dixi, non sum ad persolvendum difficilis.“ Sumam tamen, quod quibusdam visum est, verba *εἴ τι πέραν ἀερθεῖς ἀνέκραγον* significare, si quid maiore spiritu dixi. Quid tum? Si id, ut volunt, ad ea refertur, quae eum modo de Sogene dixisse putant, dupliciter minuit laudem victoris, semel confessione nimii praeconii; iterum, quum se non asperum ad persolvendum esse ait: quod quid est aliud, quam velle se nimia ista rependere iis, quae non sint nimia? Nisi hoc eum dicere voles, quod magis etiam ineptum est: si nimis laudare videatur Sogenem, morem suum hunc esse, ut prodigus sit laudis. Egregium vero praeconem, qui non tantum fateatur se modum in laudando excedere, sed tanta etiam sit impudentia, ut id illi ipsi, quem laudet, in os dicere non erubescat. Luce clarius esse puto, in toto hoc loco nihil esse, quod ad quinquertium Sogenis referri possit. Sed conficiam hanc dis-

putationem. Omnis enim erroris fons est in verbis τέρμα προβάς. Ea ita sunt omnes interpretati, ac si ὑπερβάς legeretur. Et fortasse ad hunc ipsum locum referenda est Hesychii adnotatio, προβάς, ὑπερβάς. Eadem scholiastae sententia fuit, cuius verba, in quibus recte Boeckhiius ἐξάθλων reposuit, sensu carent; nisi ita corrigantur: τοῦτο δὲ ἀπὸ τῶν πεντάθλων μετενέροχε τῶν τὸ ἀκόντιον παρὰ τὸ ὠρισμένον τέρμα βαλλόντων, καὶ διὰ τοῦτο ἐξάθλων γινουμένων. Dixit hic ἐξάθλους, qui praemio excidant, ut schol. ad Hom. Od. φ. 76. At prorsus fieri nequit, ut illud significant verba τέρμα προβάς, non magis, quam Latine *prodire* vel *praeire terminum* pro *praeterire* dicas. Quid ergo aliud est τέρμα προβαίνειν? Id videamus. Iaculo aut scopum petebant: vide Pindar. Ol. X. 85. sive Boeckhio XI. 74. XIII. 133. (89.) aut quam longe quis iacere posset experiebantur, quod est εἰς μῆκος iacere: vide Lucian. Anach. 27. Hoc est, quod Horatius dixit I. Carm. 8, 12. „saepe disco, saepe trans finem iaculo nobilis expedito.“ Disci iaciendi is modus proprius fuit: vide Pind. Ol. X. 86. (XI. 75.) et Lucian. l. c. Qui iaculo discove de spatii magnitudine certaturi essent, iis aut nullus positus erat terminus, sed qui omnium longissime iecisset, victor habebatur: ut quos Homerus in ludis funebribus Patrocli et apud Phaeaces, et Statius in sexto Thebaidis disco certantes fecerunt; aut potuit iis pro iudicum arbitrio terminus figi, de qua re nihil traditum accepimus; aut designabat aliquis finem proiecto iaculo discove, ut, qui iam certaturi essent, eum vel superare, vel saltem aequare deberent. Id facit apud Homerum Vlysses Od. 9. 186-203. qui proiecto disco Phaeaces his verbis ad certamen provocat:

τοῦτον νῦν ἀφίκεσθε, νέοι· τάχα δ' ἕξερὸν ἄλλον
ἦσειν ἢ τοσσοῦτον ὄξομαι, ἢ ἔτι μάσσον.

Aperte Eustathius p. 1591, 42. σήματα δὲ λέγει, οἷς ἐσημειοῦντο; ποῦ ὁ δίσκος ἐν πρώτῃ καταφορᾷ ἔπεσε· διὸ ὑποκατιῶν καὶ τέρματα ἐρεῖ αὐτά, εἰπὼν, ἔθηκε δὲ τέρματ' Ἀθήνη, ἥγουν σημεία, ἐνθα τὸ πρῶτον κατῆλθεν ὁ δίσκος. Hoc vero nemo

non videt, ut Latinis *terminum praeire*, ita Graecis recte dici *τέρμα προβαίνειν*. Tali iactu quum non de victoria certetur, *τέρμα προβαίνειν* idem erit atque temere et extra concertationem iaculari: id quod quum per se aptissimum h. l. sensum praebet, tum eo quoque, nisi fallor, confirmatur, quod Pindarus, qui saepe easdem sententias repetit, Pyth. I. 82. (42.) idem dicere videtur his verbis: *ἄνδρα δ' ἐγὼ κείνον αἰνῆσαι μενοινῶν ἔλπομαι μὴ χαλκοπάρχον ἄκονθ' ὥσει τ' ἀγῶνος βαλεῖν ἔξω παλάμα δονέων, μακρὰ δὲ ῥίψαις ἀμεύσεσθ' ἀντίους*. Interpretes quidem *ἀγῶνος ἔξω βαλεῖν* esse putant, iaculum extra locum certaminis proiicere. Ei explicationi nihil praesidii est in vocabulo *ἐξαγώνιος*. Nam si Lucianus, in Abdicato c. 26. T. II. p. 182, 27. iungit, *μὴ ἀπειρόκαλον, μηδ' ἐξαγώνιον, μηδ' ἀλλότριον ἢ ἀκαιρον* et pro imag. c. 18. p. 496, 14. *ἐξαγώνια καὶ πόρρω τοῦ πράγματος* et de gymnasiis c. 19. p. 898, 71. *μὴ ἐξαγώνια, μηδὲ πόρρω τοῦ σκοποῦ* non minus recte, quae ad certamen non pertineant, quam quae sint extra locum certaminis significari patet; praesertim quum ipsa verba *ἔξω τοῦ ἀγῶνος* significant, alienum quid esse: ut in eodem de gymnasiis libello c. 21. p. 902, 76. *καίτοι ἔξω τοῦ ἀγῶνος ἴσως ταῦτα*.

Facilius, opinor, Pindari locus ipse, quid sit *ἀγῶνος ἔξω*, indicat. Nam si id est extra locum certaminis, verba, quae his opposita sunt, ostendunt, non posse iactum intelligi, quo quis metani tanto spatio superet, ut iaculum etiam loci, in quo certatur, fines excedat, sed talem potius significari, quo quis adeo a meta aberret, ut in obliquum misso iaculo fines egrediatur. At, ut voluerit Pindarus dicere, „spero me non imperite, sed perite missurum esse iaculum,“ non est tamen verisimile, illam ab eo esse imperitiam commemoratam, quae maior est, quam ut in ullum hominem cadat, qui certare cum aliis audeat. Quod contra longe aptius omnia procedunt, si *ἀγῶνος ἔξω* de tali iactu intelligimus, quem quis facit non certans cum aliis. Hoc enim dicit: „spero me non sine certamine vibraturum esse iaculum, sed longo spatio superaturum adversarios.“ Eadem igitur nisi fallor, in illo loco, de quo disputamus, inest sententia, sed illa explicatius expressa.

Quum enim verba *τέqua προβάς* vix aliud videantur significare posse, quam quod diximus, *terminum praefiniens*, videtur poeta se comparare cum eo, qui sive in certamine ipso, sive in exercitationibus ante certamen, puta autem eum esse aliquem magistrum quinquertii, iaculo misso terminum signet, quumque ipse non sit in numero certantium, a iaculo ante meridiani solis calorem sine luctae sudore dimittatur, quod contra illos, qui certant, iaculi iactus, quem ex his ipsis verbis ultimum in quinquertio fuisse coniici potest, ita dimittat, ut et post meridiem et sudantes a lucta e certamine exeant. Itaque sensus verborum hic erit: „deiero, Sogenes, me non terminum praeeuntem veluti aere armatum iaculum praepetenti linguam concitasse, quod, priusquam membra ardenti soli exponantur, robur et cervicem nullo a luctae laboribus sudore manantem dimisit: si labor fuit, maior voluptas consequitur.“ Paucis haec ita comprehendas: „non temere quidquam dixi, ut qui iaculi iactum quinquertionibus praeit, ipse non certans, nec sudans a lucta: maior enim ex labore voluptas est.“ Ita indicat poeta se, quae dixerit, de industria et studiose dixisse, simulque comparatione a quinquertio petita tanto iucundiores huius certaminis victorias esse innuit, quanto maiore cum virium contentione sit parta. Quod patet Sogenis causa dictum esse, ut colligere debeamus, diuturna eum et laboriosa lucta victorem evasisse.

At, inquiet aliquis, non nisi coniectura nititur haec interpretatio, si quidem non constat, praevisse aliquem terminos. Fateor. Verum, ut permulta nos latent, quae in certaminibus istis usitata fuerunt, ita non est mirum, si ne huius quidem rei aliqua relicta est memoria, praesertim quum hoc non ad ipsos certantes pertineat. Congruit vero interpretatio nostra et cum verbis poetae, et cum totius carminis compositione, de qua mox dicam. Et si ex obscuris atque ambiguis indiciis aliquid peti potest, certe terminum, quisquis eum constituerit, iaculo discoque fuisse, illud Horatii videtur arguere, quod supra commemoratum est: „saepe disco, saepe trans finem iaculo nobilis expedito.“ Videndum vero, an eodem pertineat, quod narrat Pausanias VI. 19, 3. *ἐν τούτῳ τῷ*

θησαυρῷ δίσκοι τὸν ἀριθμὸν ἀνάκεινται τρεῖς, ὅσους ἐς τοῦ πεν-
 τάθλου τὸ ἀγώνισμα ἐσκομίζουσι. Ita quidem Amasaeus pro
 veteri scriptura ἐς ὅσους. Si illi tres disci magnitudine et pon-
 dere impares fuerunt, veri simile est, optionem datam esse cer-
 tantibus, quo disco certare vellent. Ita necesse est idem discus
 ab utroque certantium iactus fuerit. Sin pares fuerunt, tum
 quid aliud censeamus, quam unum pro termino iactum, reli-
 quis duobus certatum esse? Sed hae quidem coniecturae sunt.
 Revertamur eo, unde exorsi sumus. Si verum est, quod puta-
 mus, Pindarum, quae de Neoptolemo dixit, eo fine scripsisse, ut
 Euxenidas nulla dum victoria potitos, maximeque Thearionem,
 in Pythiis victum, consolaretur: apertum est, illa verba, quibus
 se ad Sogenem convertit, nostra interpretatione admissa, non
 modo nihil usquam offensionis relinquere, sed concinnitatem
 demum restituere toti carmini eam, ut omnia aptissime ac venu-
 stissime cohaereant. Quum enim, ubi victor Sogenes laudandus
 erat, non hoc fecerit, sed consolatus sit gentem eius patremque,
 ita tamen, ut eos simul laudaret, iam et expurgare se debet, quod
 aliena dixisse videatur, et Sogeni debitam laudem persolvere. Eo
 fine quid est, quod aptius dicere potuerit, quam illud ipsum,
 quod eum dixisse putamus: „iuro me non temere haec et incon-
 siderate attulisse, ut qui iaculo terminum praeit, expers luctae
 laboris, qui quo gravior, eo dulcior est: sine me: si longius eva-
 gatus sum, omissa largiter rependam: facile mihi, nectere coron-
 nam: impone tibi eam. Musa tibi iungit aurum atque ebur et
 margaritas: Iovisque memor splendidam Nemeae laudem caue
 tranquillus.“ Haec omnia dicit victori: non semet ipsum in
 postremis, ut scholiastae volunt, alloquitur. Neque inconsulto
 addidit ἀσυχᾶ, quod vocabulum quum *tranquillo animo* signi-
 ficet, ut Pyth. XI. 85. (55.) referri videtur ad illa ipsa adversa,
 propter quae consolatus erat Euxenidas.